

(<https://news.usm.my>)

Berita Mutakhir ▾

12 AUG PROGRAM AD'TRANS DIDIK PELAJAR HAYATI SEMANGAT KELESTARIAN BERSAMA KOMUNITI



PULAU PINANG, 10 Ogos 2015 – Program Ad'Trans 3.0 yang bertujuan menggerakkan aktiviti kesukarelawanan dalam kalangan mahasiswa Universiti Sains Malaysia (USM) mendekati masyarakat melalui sistem pengangkutan perkhidmatan awam Keretapi Tanah Melayu Berhad (KTMB) diteruskan pada tahun ini dengan melalui kawasan-kawasan seperti Butterworth, Alor Setar, Arau, Padang Besar dan Hatyai Thailand yang melibatkan 13 orang pelajar sebagai kesinambungan program yang dijalankan tahun lalu di Pantai Timur dan dimulakan dua tahun di negeri Johor.

Ad'Trans 3.0 kali ini adalah hasil kerjasama antara USM melalui Desasiswa Aman Damai dan Bahagian Jaringan Industri dan Masyarakat (BJIM) bersama-sama KTMB dan iM4U yang lebih berfokus kepada Baktiswra di lokasi-lokasi seperti SK Iskandar Kedah, SK Oran Perlis, Rumah Teratak Rahmat Perlis, Kuarters KTMB Perlis dan Prince Songkla University (PSU) Hatyai Thailand yang melibatkan juga aktiviti komuniti seperti siri motivasi, keluarga angkat dan saudara angkat.



Pelajar Pusat Pengajian Ilmu Kemanusiaan selaku Pengarah Projek, Intan Suraya Binti Zainol, 22 berkata, pendekatan melalui program seperti ini adalah selari dengan dasar kerajaan menggalakkan penggunaan perkhidmatan pengangkutan awam untuk penjimatan dan mengurangkan kesesakan lalu lintas serta menjaga kelestarian dan kebersihan udara Malaysia.

"Harapan saya agar segalanya berjalan lancar dan segala objektif akan dicapai dengan jayanya bagi mewujudkan masyarakat yang berdaya saing, mampu berdikari serta mahir dalam mengendalikan perkara berkaitan kelestarian secara berterusan dengan impak yang positif dalam menghadapi cabaran pada era globalisasi ini," katanya lagi.



Pelajar Pusat Pengajian Sains Kemasyarakatan selaku Timbalan Pengarah Projek Ad'Trans 3.0, Muhamad Syukran Bin Abdul Rahman@Omar, 23, pula mengharapkan agar pembangunan peribadi holistik pelajar dapat dijana melalui penyertaan program seperti ini agar kejayaan pada masa hadapan dapat dikecapi dalam berbakti kepada agama, bangsa dan negara melalui usaha khidmat komuniti ini.



"Kami memperjuangkan agenda kelestarian yang merupakan nadi USM dengan turut berkempen 'Katakan tidak kepada beg plastik' di dalam keretapi dan juga komuniti," tegasnya.

Muhamad Syukran mengharapkan program ini akan berjalan lancar sepanjang minggu ini dari mula hingga tamat sebagai pencetus semangat kelestarian pelajar pada masa hadapan.

Pegawai pengiring yang juga Penolong Pengawa Desasiswa Aman Damai, Mohd Zuaril Akimi Bin Mohd Shaari berkata, Program Ad'Trans merupakan inisiatif pelajar yang menjadi flagship Desasiswa Aman Damai USM melalui kerjasama strategik dengan pihak KTMB.



"Keunikan program ini adalah penerapan budaya kesukarelawanan dan khidmat komuniti yang memfokuskan kepada penduduk berhampiran dengan landasan atau stesen keretapi dan melalui program ini, pelajar berpeluang untuk menimba pengalaman berurus dengan pihak korporat seperti KTMB serta menyelami kehidupan penduduk persisir laluan keretapi," katanya. Jelasnya lagi, elemen kelestarian yang menjadi agenda utama Universiti juga dapat diperluaskan melalui kempen kepada pengguna keretapi selain peserta yang terlibat dapat melakukan praktikal program pemindahan ilmu dan kempen penjimatkan elektrik bersama sekolah terpilih di Alor Setar dan Arau.

Teks: Hafiz Meah Ghous Meah



Share This

Pusat Media dan Perhubungan Awam / Media and Public Relations Centre

Level 1, Building E42, Chancellory II, Universiti Sains Malaysia, 11800 USM, Pulau Pinang Malaysia

Tel : +604-653 3888 | Fax : +604-658 9666 | Email : pro@usm.my (<mailto:pro@usm.my>)

Laman Web Rasmi / Official Website : [Universiti Sains Malaysia](http://www.usm.my) (<http://www.usm.my>)

[Client Feedback / Comments](http://web.usm.my/smbp/maklumbalas.asp) (<http://web.usm.my/smbp/maklumbalas.asp>) | USM News Portal. Hakcipta Terpelihara USM 2015

